



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM



SBL e bula liofisi

3


Lekala le theha setsi

6



O SENOLA BOBOLU BA BCM

www.moeletsioabasothe.co.ls



Re se re fumaneha ho marangrang

Email: newsroom@moeletsioabasothe.co.ls
Tel: +266 28350466/ Whats app: 62600983

MOELETSI**Roalla le sa sele****Molapo o senola bobolu ba BCM****Nthabeleng Seithleko**

Likhohlano tse matla le liqoso tsa bobolu li hlahelletse kahar'a mokha oa BCM, moo tse ling tsa litho tse etelletsoeng pele ke Sekhonyana Molapo, li ileng tsa tlameha ho tsoa mokheng le ho theha mokha o mocha o bitsoang Basotho Land Freedom Fund. Litaba tsena li boletsoe ke Sekhonyana Molapo ka la 17 Tlhakubele monongoa-

Molapo o totobalitse hore ho bohloko ho bona naha ea Basotho e busoa ke batho ba nang le litokomane tsa Afrika Boroa, ba sa itlhompheng, ba sa etseng mosebetsi o tiileng ho khutlisa naha. O tiisitse hore ba tla sebetsa ka matla ho fihlela qetellong ho bona hore naha e'a khutle.

O re litseko tsa bona li tla ipapisa le melao le khotso. O boletse hore naha e tla latoa ho se lintoa, empa e tla emeloa ka 'nete hore Basotho ba phele ka khotso,

bo bongata. E mong Abdul Sekhonyana Molapo, ea neng a le haufi le Dr. Dipholo, o hlalositse hore mokha o mocha o tla phatlalatsa ka molao kamor'a ho ananeloa ke IEC, 'me o tla bitsoa Basotho Land Freedom Fund.

Molapo o tiisitse hore mokha ona o mocha o tla loanela naha ka botšephehi, khotso le molao. O tla sireletsa seriti sa Basotho le ho netefatsa hore bokamoso ba naha bo bolokehile. O boetse o khothalelitse sechaba hore se tšehetse mokha



ha.

Sekhonyana Molapo, mothehi oa mokha ona o mocha, o hlalositse hore taba ea ho tsoana fatše, e ne e le ntho e matla e amang sechaba sa Basotho. O re mokha oa BCM o etelletsoepele ke motho ea se nang 'nete, kaha lintho tse ngata tseo a li buileng li bonahala e le mafosisa. "Dr. Dipholo ke motho ea kotsi ea sa lokeloeng ke ho fuoa pasa, kaha a ka qetella a entse lintho tse kholo." A rialo.

O re eena le ba bang ba etelletsoeng pele ke Dr. Tšepo Dipholo, 'moho le baruti ba bang ba ile ba bona ho hloka hore ba furalle mokha oo, kaha ba hlokometse hore ke lequloana feela la batho ba litsotsi.

naheng e khutlileng.

Taba e hlahelletse ngata hore ho BCM ke mokhoa oo likhetho tsa Komiti e Kholo li neng li tsamaisoa ka ona. Ho ne ho se mokhoa o hlakileng oa ho latela molao-motheo, 'me ba bang ha b'a ka ba lumelloa ho kenya maikutlo a bona ka molao. Ha ba hloloa ho rarolla litaba tsa molao-theo le khetho ea komiti, ba ile ba qetella ka ho etsa qeto ea hore ha ho se ho le tjena, ba tla theha mokha o mocha. O totobalitse hore mokha o mocha o tla sebetsa ka 'nete, molao le botšephehi ho khutlisa naha ea Basotho.

Karolo e 'ngoe ea bao e neng e le litho tsa BCM e re ba tsoile kahar'a mokha ona hobane ho ne ho se tšebeliso 'moho le bobolu

ona ka matla, kaha taba ea naha e le bohlokoa haholo, e ka susumetsa ntlafatso ea moruo le bophelo ba batho ka kakaretso.

Mokhatlo ona o mocha o tla etella pele boiteko ba ho khutlisa naha, ho loanela seriti sa Basotho, le ho tiisa hore Basotho bohle ba na le tokelo ea ho etsa liqeto tse amang naha ea bona.

Ha phethela o re ke ntho e mpe hore ebe naha ena e busoa ke batho ba nang le litokome tsa Afrika Boroa ba sa reng letho ka kholo ea naha. O re ho khutla ha naha, kaha ba tla e tseka ho isa qetellong ka lipuisano ke ntho e t'lo thusa moruong oa naha, ntlafalong ea mesebetsi le hore mechophoro eo ba e koaletsoeng e le Basotho e ke e bulehe.

Mosotho oa masoetso o'a ba opile khomo lenaka ha a re u se ahe serobe phiri e se e jele, ikatele ka nako, e se re oa llela lebese le qhalaneng. Likoluo ha se feela lintho tse bakoang ke likhohola tsa lipula, meea e matla, lehloa le khethehang ka bongata kapa tlala e tlišoang ke komelo. Mafu a seoa a amang bophelo, le ona e ka ba koluo.

Lekala la Bophelo le morerong oa ho theha kapa ho kenya tšebetsong le ho tiisa tsamaiso ea maemo a tšohanyetso kahar'a tsamaiso ea naha ea bophelo. Taba ena e tla hlomella litsebi tsa bophelo le ba amehang ka litsebo le mekhoha e hloka halang ho arabela ka katleho ho qhoma ha mafu, likoluo tsa tlholeho le likotsi tse ling tsa bophelo.

Re fumane hore lekala le ikemiselitse ho aha tsamaiso ea bophelo e hokahanyang makala, e tla ba matla, 'me e arabelang ka potlako, e tla laola likoluo ka katleho le ho sireletsa bophelo ba sechaba.

Setsi sena re lumela hore se sebetsa haufi-ufi le Bolaoli ba Taolo ea Likoluo (DMA), e le hore ha maemo a mpefala a phahamisetsoe boemong ba koluo ea naha moo ho tla etsoa mehato e meholo ho kenyeletsoa le phatlalatsa ea koluo ea naha ke tona-kholo.

Naha ea Lesotho e tsoile letšolo ka Letona la Matla ho bona hore Mosotho e mong le e mong kahar'a Naha ea Lesotho o fumana motlakase. Taba ena haesale ea hore ke sechaba sa mabalane feela se bang le motlakase, empa ke Basotho bohle ba phelang kahar'a naha. Matsatsing a morao tjena motlakase e se e le tlhoko ea mantlha ho sechaba le ho latela liphetoho tsa bophelo.

Sechaba sa Makatseng le Phahameng tikolohong ea Sempe Quthing ruri le sona se t'lo imona monoana, le bophelo ba bona bo t'lo matlafala le barutoana ba likolo ba tla atleha ho phahamisa setereke sa habo bona ka ho atleha lithutong. Uena lefifi haeno ke naheng, o se o tla ba pale ea maobane. Ho tla pekoe joale.

Banka ea Standard Lesotho e ntse e nanabetsa litšebeliso ho bareki ba eona ka ho bula liofisi tse ncha hore litšebeliso li tsebe ho pharalla le naha, haholo moo sechaba se khobokanang ka bongata, hore se fumane litšebeliso haufi. Bareki ke batho ba bohlokoa 'me ba hloka ho eloa hloko ho se khethollo ea mofuta o fe kapa o fe. Re thoholetsa haele mona litšebeliso li anela Lesotho kaofela, 'me bareki ba behoa sebakeng se sireletsehileng le se loketseng moo ba ka buisanang ka bolokolohi le baeletsi ba bona ba lichelete.

Ho bonahala Marena a Sehlooho morao tjena a se a sa fuele tlhompho e ba lokelang, ho se ho shejoa Bakhethoa ba Sechaba. Ebe taba ee e bakoa ke'ng? Litho tsa Ntlo ea Mahosana li seboko ka ho se eloe hloko meketeng e meholo ea naha. Litho li re maemo a joalo a nyenyefatsa bohlokoa ba Senate e le Ntlo e kaholimo ea ketsa-molao.

Ho se shebele litaba 'moho kapa ho fapana ka maikutlo, ha se hore ha re sa le Basetho. Ho khaola maqhama ka khotso re utloa e le litaba tse khothatsang tse bontšang kutloisiso ea polotiki, moo re sa e batleng ke hore joale ho be le lintoa le lipuo tse hlhlonšang litsebe.

Mokha oa BCM ke oo o arohana likoto tse peli ka lebaka feela la ho se shebele litaba 'moho, le ho se phethise litšepiso. Joale potso eo re lulang re ipotsa eona kamehla ke hore na ke hobaneng ha litho li arohana e le hona ba buoanang ka bobolu, fela e ne e ntse e le karolo? B'a sebana, ba ea buana, ba ea somana, ba supana ke menoana. Che re se re tseba hore litaba tsa lipolotiki li joalo.

MOLIMO A BOLOKE LESOTHO LE BASOTHO

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO

A LOKHISETSE MORENA SECHABA SE PHETHEHLENG (LUKE 1:17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seithleko

Tšelis Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

MOELETSI O TŠEHETSA BACHA

Tšeliso Thakholi

Ka lebaka la maemo a teng hajoale a tlhokahalo ea mesebetsi kahare ho bacha, haholo ba qetang ho abeloa mangolo a fapakaneng a thuto phahameng ngoahola-kola le ngoahola, bahlankana ba babeli le basali ba ba tšeletseng ba ntseng ba le banyenyane haholo lilemong, ba phelang tikolohong ea Bokong Seterekeng sa Thaba-Tseka, ba ikopantse ho etsa lihlahisoa tsa Sesotho, tsa joang, tse kang likatiba ka mefuta, liroto, lirotoana, mafielo le meseme. Ba boetse ba ipabola ka ho rulela ka joang matlo a Sesotho. E mong oa baikopanyi, Mofumahali 'Mathato Lebesa(26), o re qoqela ka qaleho ea boikopanyo le tšebetso ea bona.

LERATO LA HO IQALLA KHOEBO

Joalokaha re bile bacha ba ntseng ba hola le ho kena sekolo 'moho, hona mona Bokong le Ha Lejone, esale re rata mosebetsi oa matsoho, re rata ho boikopanyo le ho iketsetsa. Taba ea rona ea boikopanyo e qalile khale haholo re sa ntse re le sekolong, moo re neng re atisa ho kopanela lebokose la masimba le lipompong re li rekise, nakong tsa mekete e mehola

ea likolo.

E be chelete eo re e bokeletseng re e arola ka ho lekana, ea ba re ntse ithuta hore boikopanyo bo bohlokoa, 'me bo ka re tsoela molemo haholo ha fela re ka hla ra bo ntšetsa pele bophelong ba rona. Hang hoba re qete likolong tsa mathomo le tse phahameng re ile ra etsa lithuto tsa mahlale, 'me kamorao ho mona ra ikopanya ka litsebo tsa rona tse fapakaneng.

Morero e ne e le ho bula

lebenkele le lehola le tla rekisa lijo, liaparo le thepe eohle ea moaho. Empa e itse ha re hlokomela hore hona le bahahlaoli ba bangata ba etelang letamong la Katse le libakeng tse ngata tsa metse ea habo rona ho ea ithuta ka nalane ea Basotho, ra fetola monahano, ra bona ho le molemo hore re iqalle khoebo e se nang litšenyehelo tse ngata, ka thepa e fumanehang habobebe e leng ea joang. Taba ena ea rona e boetse e kenyelilitse le bo-

e ile ea theoha haholo.

Ka lehohlonolo lintlafatso tse neng li ntse li etsoa li felle, re se re lebeletse hore e buloe, e le hore re tle re boele re il'o etsa kopo kaha re ithutile hore bohahlaoling mona bophelo bo teng. Hantle bareki ba baholo ba rona ke bahahlaoli ba tsoang kahare le kantle ho naha.

THAHASELLO EA KHOEBO

Ha re tla ba le thahasello ea khoebo ea mofuta ona

Maseru ho ba bang ba bareki ba baholo ba rona ba e sebelisang ho khabisa ka matlong a lijo, matlong a kamohelo ea baeti le batho ba e rekang ka bo mong.

TORO

Taba ena ea lihlahisoa tse entsoeng ka joang ba Sesotho ha se taba ea khoebo feela, empa e boetse e bapatsa boleng ba rona re le Basotho machabeng. Ka hona re ka lakatsa ho bona khoebo ea rona e holile ho feta mona, ebile e se e fumaneha literekeng tsohle



hahlaoli hoba re na le mocha ea ithutetseng litaba tsa bohahlaoli ka ho khetholoha.

QALEHO EA TŠEBETSO

Sethathong khoebo ena ea rona e ile ea qala hantle kaha re ne re sebeletsa Katse Lodge, moo re neng re fuoe phaposi ea ho rekisa le ho bapatsa lihlahisoa tsa rona tsa Sesotho, e le ho hohela bahahlaoli ha ba etetse Katse ho tla boha botle ba matamo le maluti a Lesotho.

Empa Katse Lodge e ile ea koaloe, ka lebaka la hobane e ne e ntse e ntlafatsoa e le hore e be mae-mong a machaba. Taba ena e ile ea re ama habohlolo hoba joale re ile ra tlameha ho batla sebaka seo re tla rekisetsa ho sona. Khoebo

re ne re ile ra khahloa ke bahahlaoli le ka lebaka la hobane re ne re hlokometse hore taba ea ho theha lebankele ho tla re hloka litšenyehelo tse ngata haholo, empa mofuta ona oa khoebo o litšenyehelo li fokolang haholo, e bile o etsa phaello e holimo ha-feela re atlehile ho rekisa hantle.

KHOLO EA KHOEBO

Le ha ho bonahala khoebo e ntse e hola, qholotso e kholo eo re kopanang le eona ke mokhoa oa ho fumana sebaka seo re ka rekisetsang ho sona haufi le bareki. Hona joale re se re atleha ho rekisa ka ho kena ntlo le ntlo le ka mekete e mehola e bang teng ea setereke le Ha Katse. Re boetse re na le thepa e 'ngoe eo re e romellang

kahare ho naha. E boetse ke thuto ho bacha ba habo rona hore ba hole ba tseba lisebelisoa tsa Sesotho.

KELETSO HO BACHA

Ka 'nete 'na ke khothaletsa bacha ho sebelisa litalenta tsa bona, empa e kholo ka ho fetisisa eo ke ba kopang eona ke boikopanyo, ka litsebo tseo ba nang le tsona. Bacha ba lokela ho ba le botšepahi ha ba ikopantse e le hore ba tle ba tsebe ho fihlela seo ba se laba-labelang le ho holisa likhoebo tsa bona. Ha ba ikopantse ho ba bonolo hore mamati a lithuso a bulehe. Ka mantsoe a mang, boikopanyo ke bona feela boka tsebang ho ba bulela mamati a bophelo. Bacha kopano ke matla, etsoe lefu la noha ke ho tsamaea e le 'ngoe.

57396597
28 350 815

Mazenod PRINTING WORKS Pty Ltd
28 350 466
lesaoanat@gmail.com

Malebela

Scan me

U se u ka fumana buka ea Malebela ho marang-rang a boletsoeng ka tiase kapa oa sebelisa code e kaholimo.

"Get the Akello app on Play Store, App Store, or Huawei App Gallery for Mazenod books and more. Download now!"

<https://library.akello.co/downloads>

akello



Basotho b'a kopana

Nthabeleng Seithheko

Mekhatlo e fapakaneng, marena le baemeli ba sechaba ba bile le 'moka oa bo-ralitaba ka la 17 Tlhakubele monongoaha, ho buisana ka taba ea ho khutlisa libaka tseo ho thoeng ke tsa Basotho, ka sepheo sa ho sireletsa seriti sa naha le bokamoso ba meloko e tlang.

Puong ea hae moemeli oa Naka la Mohlomi, Moorosi Moshoeshe, o hlalositse hore ka 'Mesa ngoahola, mekhatlo hammoho le marena a Lesotho ba ile ba ema ka matla ho hanyetsa boiteko bo fe kapa bo fe ba ho arola Basotho, kapa ho fetola Lesotho hore e be karolo ea Naha ea Afrika Boroa. O boletse hore Basotho ba ikemiselitse ho sireletsa naha ea bona, ba sa lumelle hore

nalane e silafatsoe.

Mateboho Phatšoane oa Lesotho la Basotho, o tobalitse hore sepheo sa bona ke ho loanela seriti sa naha ka mekhoha e khutsitseng, e thehiloeng nalaneng le molao. O boletse hore ba batla ho khutlisa naha ka lipuisano le ka ho hlompha litokelo tsa botho, a nyatsa ka matla ho se buisane litabeng tse amang sechaba.

Ka lehlakoreng le leng, Dr. Letooa Matete, o hlalositse hore kopano ena e thehiloe tumellanong le kanong ea tšebeliso 'moho, moo ba ikemiselitse ho sebetsa ka molao, pepenene ho khutlisa Naha ea Lesotho. O tiisitse hore Lesotho ke naha e ipusang, e nang le Molao oa Motheo, 'me boiteko bo fe kapa bo fe bo lokela ho hlompha melao ea naha le ea machaba.

Moetapele oa baqosi o itse Basotho esale ba ntse ba loanela naha ena ka nako e telele, 'me motho e mong le e mong o na le

tokelo ea ho kenya letsoho ho latela molao oa motheo, haholo temana ea 20 e fanang ka tokelo ea ho bua le ho ntša maikutlo.

Morena Thooko Makoe, a emetse Kopano ea Bakuenana Southern Africa, o boletse hore ke boikarabelo ba bona ho sireletsa naha, kaha ke majalefa a eona. O bontšitse ho tšoenyeha ka hore paramente ha e-s'o nke mehatlo e hlakileng tabeng ena, a re ho bohlokoa hore 'muso o kenelle ka matla. "Ha re na bolokolohi bo felletseng ha naha ea rona e ntse e koaletsoe kahar'a meeli ena," ho boletse eena, a hatella hore taba ena e hloka tšebeliso 'moho le khotso.

Lekhotla la Bafo le lona le boletse hore ke khale le ntse le loanela taba ena ho tloha ka 1913, le ipona e le lekhotla la pele la boitseko naheng. Le re ho bohlokoa hore marena le sechaba ba sebetsa 'moho ho fihlela sepheo sena.

Lipotso tse hlahileng

kopanonng li akarelletsa hore na sechaba se ka nka karolo joang ho tseka naha. Ba bang ba arabile ka hore ha ho na molao oa machaba o thibelang naha ho tseka libaka tsa eona, 'me nalane e bontša hore linaha tse ling li atlehile ka lipuisano.

'Manthateng Mofela oa Lekhotla la Bafo o itse taba ena e hloka boitelo, tsebo le tšebeliso 'moho. "Re loanela bana ba rona le bokamoso ba bona, 'me ke nako ea hore Basotho ba kopane." Ho boletse eena.

Sekhonyana Molapo mothehi oa Basotho Land Freedom Fund, o nyatsitse liketsahalo tse ling tseo a reng li bontša bobolu le ho iphumanela melemo ka mabitso a Basotho. O boletse hore mokhatlo oa hae o ikemiselitse ho sebetsa ka botšephehi ho khutlisa naha ntle le likhohlano. Qetellong baemeli ba kopano ba entse kano ea ho sebetsa ka khotso, ka 'nete le ka tšepo, ba ikemiselitse

ho sireletsa Naha ea Lesotho le ho e boloka e le ea Basotho bohle.

Kopano e phethetsoe ka molaetsa o matla oa bongoe, hore Basotho ba tšoanetse ho ema 'moho, ba hlomphane le ho sebetsa ka boikarabelo ho sireletsa naha le bokamoso ba eona.

Tseba boemo

ba hau u

alafshoe



Lekala la Bophelo le theha setsi

Nthabeleng Seitlheko

Ka sepheo sa ho ntlafatsa boitokisetso ba ho lemoha le ho arabela likoluo le mafu a seoa, Lekala la Bophelo ka tšebeliso le Africa CDC le matlafatsa bokhoni ba naha ba ho laola maemo ana a bophelo ka thupelo ea Tsamaiso ea Maemo a Likoluo (PHEM), tsena li etsahetse ka la 17 Tlhakubele monongoaha.

Morero ona o reretsoe ho kenya tšebetsong le ho tiisa tsamaiso ea maemo a tšohanyetso kahare ho tsamaiso ea naha ea bophelo. Ho lebelletsoe hore thupelo ena e hlomelle litsebi tsa bophelo le ba amehang ka litsebo le mekhoha e hlokalang ho arabela ka katleho ho qhoma ha mafu, likoluo tsa tlholeho le likotsi tse ling tsa bophelo.

Ka lenaneo lena, lekala le ikemiselitse ho aha tsamaiso ea bophelo e hokahaneng hantle, e matla, e arabelang ka potlako, e ka laolang likoluo ka katleho le ho sireletsa bophelo ba sechaba.

H'a bua ketsahalang ena, Mookameli oa melao ea machaba ea bophelo Lekaleng la Bophelo, Khotso Mahomo, o totobalitse hore Lesotho le nkile mohato oa bohlokoa ka ho theha setsi sa tsamaiso ea Maemo a Tšohanyetso a Bophelo.

O hlalositse hore setsi sena e tla ba setsi sa naha sa ho hokahanya mosebetsi, moo makala a fapanang a 'muso, balekane le mekhatlo li tla sebetsa 'moho ho arabela maemong a tšohanyetso a joaloka ho qhoma ha mafu.

O ekelitse ka hore ho itšetlehlile ka boemo, ba bohlong ba tsoang makaleng a fapanang ba tla kopanngoa ka phapusing ea taolo ea tšohanyetso ho hokahanya karabelo ea naha.

Mahomo o boetse a bontša hore setsi sena ke karolo ea tsamaiso e pharalletseng ea taolo ea likoluo naheng, 'me se tla sebetsa haufi-ufi le Bolaoli ba Taolo ea Likoluo (DMA). Ha maemo a mpefala, a ka phahamisetsoa boemong ba koluo ea naha, moo ho ka etsoang mehato e meholo ho kenyeletsoa le phatlalatsa ea koluo ea naha ke Tona-Kholo.

O boletse hape hore ho thehoa ha setsi sena ho latela khoelehetso ea konti-



nente ea hore linaha tsohle tsa Afrika li be le litsi tse sebetsang tsa mofuta ona pele ho selemo sa 2026, ho matlafatsa boitokisetso le taolo ea likoluo tsa bophelo.

O bontšitse hore Lesotho le se le hatetse pele, kaha setsi sena se se se thehile ka tšebetso ea 'muso le balekane ba ntšetsopeleng, 'me se tla tsebisoa ka molao haufinyane. Lebitsong la Letona la Bophelo, 'Matšoanelo Monyobi o hlalositse hore ho thehoa ha setsi sena ke mohato oa bohlokoa ho matlafatsa poloheho ea

bophelo naheng. O boletse hore morero ona o tšehetsoa ke mekhatlo e kang WHO, Africa CDC, UNICEF le Banka ea Lefatše e tla thusa Lesotho ho itokisetsoa, ho arabela le ho thibela likoluo tsa bophelo.

O ekelitse ka hore mohato ona o latela qeto ea baetapele ba Afrika kopanong ea bone ea kopanelo ea African Union e neng e tšoareletsoe Lusaka, Zambia ka Phupu 2022, e ileng ea khothaletsa linaha tsohle ho theha litsi tsena pele ho 2026.

Monyobi o hatelletse

hore ho theha setsi sena ha se mosebetsi oa nako e le 'ngoe, empa ho hloka matsete a tsoelang pele ho meaho, theknoloji le ntšetsopeleng ea basebetsi. O totobalitse bohlokoa ba koetliso e tsoelang pele, liteko tsa maemo a tšohanyetso le ho ithuta ho tsoa likoluoeng tsa 'nete.

Ka lehlakoreng le leng, Mookameli e Moholo oa Bolaoli ba Taolo ea Likoluo, Reatile Elias, o itse bolaoli bona bo na le boikarabelo ba ho hokahanya litaba tsohle tsa likoluo naheng, ho kenyeletsoa boitokiset-

setereke, Mpho Leina, o itse Lefapha la Bophelo Seterokeng sa Thaba-Tseka le thusitsoe haholo ke AHF litabeng tsa HIV le AIDS. O ile a leboha mokhatlo ona ka limpho tseo o li faneng.

O boetse a bontša hore ba matlafalitse thuto sechabeng mabapi le lefu lena, hammoho le ho ruta batho mekhoha ea ho iphelisa, kaha batho ba phelang le HIV ba hloka phepo e nepahetseng.

Ho sa le joalo, Mookameli oa AHF, Nthoesele Letoao, o ile a leboha bookameli ba Sepetlele sa St. James, ka boitelo ba bona tlhokomelong ea bakuli. A re AHF ke mokhatlo o ikemetseng o tsoang United States of America, a tiisa hore o tla tsoela pele ho sebetsa Lesotho.

"Ke rata ho netefaletsa Basotho hore AHF e bile teng ho tloha ka selemo sa 1986, 'me e ntse e le teng le hona joale. E tla lula e tšehetsa 'muso ho fihlela naha e ikemela tabeng ea litšebeliso tsa bophelo." A rialo.

O tsoetse pele a re leha ba thabetse ho fana ka

so, thibelo, karabelo le ho hlaphoheloa.

O hlalositse hore molao o thehileng ke bolaoli o fana ka boikarabelo ba hore ho be le mekhoha e sebetsang ea ho itokisetsoa likoluo, ho arabela ha li hlaha le ho hlokomela tsosoloso kamor'a moo.

Elias o bontšitse hore bolaoli bo laola likotsi tse ngata tse amang naha, empa tabeng ena ba tsepamisetse maikutlo ho matlafatsa tšebeliso le taolo ea maemo a tšohanyetso a bophelo.

O boetse a re bolaoli bo tla tšehetsa ho thehoa le tšebetso ea setsi sena tlas'a Lekala la Bophelo ho ntlafatsa bokhoni ba naha ba ho arabela likotsi tsa bophelo.

O ile a supa hore seoa sa COVID-19 se bontšitse bohlokoa ba ho ba le tsamaiso e matla ea karabelo, kaha se ile sa senya bophelo, sa ama likhoebo le ho baka tahlehelo ea bophelo.

Ho ea ka eena, seoa sena se ile sa leka bokhoni ba Lesotho ba ho arabela, sa bontša tlhoko ea ho matlafatsa boitokisetso le tšebeliso.

Qetellong Elias o itse ho ntlafatsa tsamaiso ena ho tla thusa ho sireletsa bophelo le thepa, le ho etsa hore naha e be boemong bo betere ba ho arabela likoluo tsa bophelo nakong e tlang.

limpho, ho ntse ho e-na le phephetso ea hore ho na le Litsi tsa Bophelo tse tharo sebakeng seo tse ho leng thata ho fihleleha.

Letoao o boetse a totobatsa hore selemong se fetileng ba atlehile ho bula setsi sa bophelo se lebisitsoeng ho banna, e leng se fokolitseng palo ea banna ba tšabang ho ea litsing tsa bophelo. A re sena ke katleho e kholo.

Lebitsong la mokhatlo oa Women in Dialogue, 'Matšepo Ramakoae o itse AHF e mo khethile hore e be 'mampoli oa ho buella litaba tsa mofetše. A re leha AHF e le mokhatlo o monyenyanane, o kentse letsoho haholo ho fokotsa tšusumetso ea HIV le AIDS.

"Ha batho ba tla litsing tsa bophelo, ba lokela ho khothaletsoa ho hlahlojoa mofetše, ho sa tsotellehe mofuta oa ona. Lipalo tsa bakuli ba mofetše li ntse li nyoloha mona Maloting, 'me sena se bakoa ke lenyalo la bana ba banyenyane. Ke kopa baoki hore ba tsoele pele ho sebetsa ka thata ho thusa bakuli." O buile joalo.

AHF e etsa letsoho la monna

Nthabeleng Seitlheko

Tona-Kholo Samuel Ntsokoane Matekane o itse Mantšonyane e bonahala e ateloa ke lintho tse ntle, kaha sepetlele sa moo se fumane limpho ho tsoa mokhatlong oa AHF ka la 17 Tlhakubele monongoaha.

A re sena ke sesupo sa hore Naha ea Lesotho e ka ikemela, ho sa tsotellehe hore linaha tse ling li ka ikhula tšehetsong ea tsona.

"Ha linaha li ntse li ikhula AHF eona e ntse e tsoela pele ho thusa 'muso. Le rona re lehlohonolo hobane Molimo o re file naha e nang le masimo. Re buile le Lekala la Bophelo le la Temo hore re tšoaraneng ka matsoho ho bona hore batho ba fuoa lipeo hore ba leme, e le ho loantša phepo e fosahetseng, hore re se hlole re

ba le sechaba se ntseng se phalleloa ka lijo." A rialo.

Matekane o boetse a re o utloile hore ho ntse ho na le liperesente tse tharo tsa Basotho ba e-s'o atamele Litsi tsa Bophelo ho tseba boemo ba bona mabapi le kokoana-hloko ea HIV. "Kea le kopa ba heso, atamelang Litsi tsa Bophelo le tsebe boemo ba lona, hobane sena se tla etsa hore le tsebe ho nka liqeto tse nepahetseng ka bophelo ba lona." A hlalosa.

Tona-kholo o ile a boela a ipiletsa ho sepetlele hore se hlokomele thepa le ho netefatsa hore e sebelisoa molemong oa batho ba e hlohang. O ile a khahlisoa ke bohloeki ba sepetlele sena, a leboha le basebetsi ka mosebetsi o motle oo ba o etsang, a supa hore ha ho tšubuhlellano ea bakuli kaha ba inehetse mosebetsing oa bona.

Ka lehlakoreng le leng ngaka e ka sehloohong ea

Khokelo ea motlakase e'a pharalatsoa

Nthabeleng Seitlheko

Letona la Matla Mohlomphehi Mohlomi Moleko, o hlahisitse ka molao likamphani tse tla phethahatsa merero ea khokelo ea motlakase libakeng tsa Makatseng le Phahameng, tikolohong ea Sempe, Quthing, ka la 16 Tlhakubele monongoaha.

Morero ona o tlo sebelisa chelete e kaholimo ho M45Millione 'me e lebelletsoe ho thusa malapa a fang 711 Phahameng le a 52 Makatseng. Morero oa Phahameng o lebelletsoe ho phetheloa ka Pulungoana selemong sena, ha oa Makatseng o reretsoe ho phethoa ka Hlakola 2027.

Morero oa ho hokela motlakase Makatseng o tla etsoa ke kamphani ea Lesehe Electricity Connection Company, ha Treasure Investment Group eona e tla sebetsa morerong oa



Phahameng.

H'a bua ketsahalong ena, Mohlomphehi Moleko o hatelletse boitlamo ba 'muso ba ho netefatsa hore mala-

pa ohle Lesotho a hokeloa motlakase pele ho selemo sa 2030. O re ho tsebisoa ha likamphani tsena sechabeng ke mohato oa

bohlakoa ho potlakisa ntšetsopele metseng e fapaneng.

O boetse a phatlalatsa hore selemong sena sa li-

chelete, lekala le tla aha matamo a maholo a polokele ea mafura, e le ho sireletsa naha khahlanong le mathata a phepele ea mafura a tsoang linaheng tse ling, a bakoang ke likhohlano tsa lefatše tse kang tse amang Amerika, Isiraele le Iran.

O ekelitse ka hore selemong se tlang sa lichelete, 'muso o tla tsetela ho hlahiseng motlakase le ho ntlafatsa marang-rang a phetisetso, e le ho fokotsa ho itšetleha ka motlakase o tsoang Afrika Boroa le Mozambique.

Ka lehlakoreng le leng setho sa Paramente sa Mount Moorosi, Thuso Moselele, o tiisitse boitlamo ba 'muso ba ho tliša merero ea ntšetsopele e ntlafatsang bophelo ba sechaba.

Mokanselara oa Phahameng Tumaole Tsoelipe o bontšitse thabo e kholo ka morero ona oa motlakase, a tšepisa hore sechaba se tla sebetsa 'moho ho netefatsa hore morero ona o'a bolokeha le ho tsoelapele ho thusa meloko e tlang.

Senate se khotlaletsa liphetoho

Nthabeleng Seitlheko

Tulong ea Ntlo ea Mahosana ea la 17 Tlhakubele monongoaha, litho li bontšitse li tšoenyehile mabapi le tsamaiso ea mokete oa sehopotso sa Morena Moshoeshoe I, 'me likhohlaletsa hore ho etsoe liphetoho tse hlakileng ho o ntlafatsa nakong e tlang.

Motlatsi oa Mookameleli oa Ntlo ea Mahosana, Mohlomphehi Tsukutlane Au, o boletse hore Senate se lokela ho bapala karolo ea bohlokoa ka ho elets'a 'muso ka mehato e ka etsoang ho matlafat-

sa mokete oo. O totobalitse bohlokoa ba hore taba ena e tšohloe ka botlalo kahare ho Ntlo. A re ba lokela ho fumana nako ea ho hlahloba le ho elets'a 'muso.

O ile a bontš'a hore litho tse ling tsa Senate li bile teng Thaba-Bosiu nakong ea mokete, kahoo li na le tsebo tseo li ka arolelanang ka tsona ho ntlafatsa merero ea kamoso, molemong oa ketekelo tse anelang batho bohle.

Ka lehlakoreng le leng Morena oa Sehlooho oa Kueneng, Morena Peete Lesaoana Peete, o supile hore marena a ela hloko bohlokoa ba sehopotso sena, empa a sup'a hore ho ntse ho na le liphephetso tse hlokanang ho rarolloa. O ile a

hlahosa hore leha mokete o ile oa tsamaisoa hantle, ho na le lintlha tse hlokanang ho lokisoa, haholo-holo mabapi le tlhokomelo ea litho tsa Senate.

O ile a tletleba ka hore litho tsa Ntlo ea Mahosana ha lia ka tsa hlophisetsoa hantle nakong ea mokete, hoo li ileng tsa qetella li hloka litulo kamor'a ho amohelela Morena Letsie III. Ho ea ka eena, sena se bakiloe ke hore litulo li ne li se li nkiloe ke Bakhethoa ba Puso ea Libaka.

Morena Peete o ile a ipiletsa ho Komiti ea Boiketlo ba Ntlo hore e nke mehato e potlakileng ho lokisa bothata boo, a re maemo a joalo a nyenyefatsa bohlokoa ba Senate e le Ntlo e kaholimo

ea ketsa-melao.

O ile a boela a thoholetsa Tona-khoho Sam Matekane, ka boetapele ba hae, a re ke motho ea etsang ho feta ho bua. Leha ho le joalo, o ile a mo elets'a hore a tsoele pele ka boikokobetso le ho kopa bohlale ho Molimo.

Ka lehlakoreng le leng Morena oa Sehlooho oa Ha 'Mamathe Morena Khabasheane Masupha, o bontšitse hore mokete oa sehopotso o se o fetohile ha o bapisoa le lilemong tse fetileng. O re pele, mokete o ne o tsepamisitse maikutlo ho mesebetsi ea ntlafatso ea sechaba, empa kajeno o se o lebis'a haholo ho boithabiso.

O ile a hatella hore marena a lokela ho kenya letso-

ho meralong le tsamaisong ea mokete, kaha a tšoare korone ea Morena. O ile a boela a bontš'a ho tšoenyeha ka hore marena a tlositsoe ho karolo ea parate, ha bo-ralipolotiki bona ba nka karolo e khoho. Morena Masupha o ile a re ho bohlokoa hore taba ena e etsetsoe molao e le hore ho be le liphetoho tse hlakileng.

Ka kakaretso lipuisano tsa Ntlo ea Mahosana li bontšitse tlhokahalo ea hore mokete oa sehopotso sa Morena Moshoeshoe I o hlophisoe bocha, o be le tekatekano lipakeng tsa bochaba le tlhomphe ea marena, e le hore o be le moelelo o maholo ho Basotho.

NEW

WIDE FORMAT PRINTING

We offer durable, affordable & quick turnaround wide format prints. We can provide multiple options for indoors and outdoor applications - as well as produce any size you can imagine

FOR YOUR FUTURE WE CARE


- BANNERS
- SIGNS
- POSTERS
- PRINTS

Call or whats App: +266 28350815/ 22350224/ 68078124 (Whats app)

Mazenod PRINTING WORKS (Pty) Ltd
Prepare good People for The Lord



MOB Kidds Edutainment



Across

- 1 Ke ngoana ea shoetsoeng ke motsoali a le mong. (8)
 4 Ke ngoana ea hlahang moholoane oa hae a hlokahatse. (6)
 6 Ke bana ba neng ba inngoe ka nako e le 'ngoe ke mosali a le mong. (8)
 9 Ke ngoana ea holisoang a oloa ka lesiba kapa a tefisoa. (10)
 10 Ngoana eo motho a ikhuliselitseng eena a mo thotse. (6,2,7)
 11 Ke ngoana oa ngoanana ea senyehetseng lapeng. (6,2,7)

Down

- 1 Ke ngoana oa hofela lapeng labo. (7)
 2 Ngoana ea hlahileng ka monna o sele ho mosali ea nyetsoeng. (10)
 3 Ngoana ea tsoetsoeng ke ntat'ae (6,2,7)
 5 Ke ngoana oa maiketsetso ea pepisoang moopa/nyopa ka sepheo sa ho rapela hore Molimo a mo fe ngoana. (6,2,4)
 7 Ngoana oa matsoathaka/ ngoana oa pele lapeng (9)
 8 Ke ngoana ea tsoetsoeng a le mong habo. (9)



TSA KEREKE

Barati ba Josefa boikhutsong

Staff

“Ha re eeng ho Josefa, re etseng seo a re laelang sona.” Barati ba Josefa ba bile le boikhutso bo koaletsoeng ba matsatsi a mane, bona bone bo tsoaretsoe setsing sa liphutheho sa Maoblata, Mazenod, ka la 12 ho isa la 15 Tlhakubele monongoha.

H'a manolla tsa mokhatlo oa Barati ba Josefa Mookameli 'mé Semakaleng Phafoli u qalile pele ka hore bolella hore ka la 8 Tšitoe 2020 ho isa la 8 Tšitoe 2021 hang kamor'a hore Mopa-

tle ke mang. A re mokhatlo oa bona o amohela bakriste bohle, ho tloha ka ngoana ea lilemo li 13, hafela a se a amohetse Sakramente ea Tiiso, le bakriste ho tsoa likopanong tsa kereke esitana le baprista le bailtami mamati a butsoe.

O itse sepheo sa boikhutso bona bo neng bo koalletsoe e ne e le ho tla tšohla melao, maono, meralo, le ho tsebana, 'me boikhutso bona bo ba pele ho letsatsi la li 19 Tlhakubele e leng la Mokete oa Josefa ea Halalelang, ka la 1 Motšeanong e tla ba bo buletsoeng bohle, moo e leng Mokete oa Josefa. A re mosebetsi o mong ke ho nyolla moea oa

A Phethela ka hore mokhatlo oa bona ke oa pele lefatše ka bophara, 'me koano lapeng o se anetsoe ka selemo sa 2025, ke Seboka sa Babishopo ba Kereke e Katholike, ho setseng feela ke hore o hlohonolofatsoe ka molao. A re lintho tsohle tseo ba li etsang ba li etsa ba le tlas'a sekhele sa babishopo, 'me ba se ba bile ba filoe Ramaea eo ba tlang ho ikarabella ho eena, e leng Fr. Emanuel Lebeso Mokhofu OMI. O re ba tl'o tsoa letšolo ho potoloha le likereke tse katholike Lesotho e le ho tsebahatsa mokhatlo oa bona, hajaole ba ntse ba sebelisa Radio Maria.



pa Francis ea Halalelang a phatlatse selemo seo e le sa Josefa ea Halalelang, ke moo ba ileng ba phamolela litaba tseo holimo ka ho ea ka libaka ka ho fapakana ho ikhethela ho tsebahatsa le ho ruta sechaba ka Josefa. Ho ruta hore a tsejoe, a hlo-nepshoe, a ratoe ka lefatše lohle joaloka Maria Movirigo.

A re ba qalile e le sehlopha sa batho ba 18 ba neng ba rapela ka mokhoa oa marang-rang ka lebaka la seoa sa COVID 19, empa ha joale ke sehlopha sa batho ba kaholimo ho 50, 'me ba se ba fumaneha litikolohong tsena tse 'ne tsa Naha ea Lesotho.

A re taba ea mantlha ea mokhatlo ke ho ithuta ka Josefa boinotsing ba bona le boiphanong ba bona, le ho utloisisa ka eena le litaba tsa hae le hore na han-

borapeli. O re mosebetsi oa mokhatlo ke ho phatlatse, ho anetsa le ho tsebahatsa bohlokoa le matla a Josefa, 'me bona ba fapane le kopano ea Josefa kaha eona mosebetsi oa eona ke ho thusa malapa, ho a bopa hore ebe ntho e le 'ngoe, hore a tsebe ho ntlafala, ho ba letsoho la moprista, le ho thusa ho lokisa kereke le tsohle tse amanang le eona.

A re o mong ke ho bona hore lifika tsa Josefa li ea ahoa hohle likerekeng, hobane ho thoe Josefa ke mosireletsi oa kereke. Taba e 'ngoe e tla hlaha kahar' a meralo ea bona ke ho thusa ka Sekolong sa Koetlisa ea Baprista, le ho khotaletsa hore ho be le thuto ka Josefa hobane ka Maria Movirigo le ka Jesu e teng, e le hore baprista ba bacha ba tsebe litaba tsena ba li fumane ka lingoloa.

Thapelo ea Khotso

Oho Molimo oa toka le khotso, re hlonolofatse rona baahi ba Lesotho, 'me u re thuso ho phela khotsoeng le leratong la hao.

“Morena, nketse mosebetsi oa khotso ea hao. Moo lehloeo le leng teng, ke jale lerato. Moo batho ba fosetsaneng, ke jale tsoarelo. Moo lipelaelo li leng teng, ke jale tumelo. Moo batho ba nyahameng pelo, ke jale tšepo. Moo lefifi le leng teng, ke tlise leseli, Moo masoabi a leng teng, ke jale thabo. Molimo oa ka, etsa hore ke se ipatlele ho tšelisoa, ke mpe ke tšelisise ba bang. Ke se ipatlele ho utloisisoa, ke mpe ke be ea utloisisang ba bang. Ke se ipatlele ho ratoa, e mpe e be 'na ea ratang ba bang, Hobane ke ka ho fana, re fumanang, ka ho tsoarella, re tsoareloang. Ka ho shoa, re tsoalloang bophelo bo sa feleng.

Amen.”

2025-2026 SELEMO A

SONTAHA SA 5 SA KARISIMA



Ezekiele 37:12-14

Pesalema 129

Ba-Roma 8:8-11

Joannes 11:1-45



Khothatso

Ke 'na tsoho le bophelo

Lithuto tse tharo tseo re li balileng kajeno li bua ka ntho e le 'ngoe: tsoho ea bafu. Bukeng ea Moprofeta Ezekiele, re utloa hore ho tsoa bokhobeng ba Babilona ha Bajodi ho tsoantšoa le ho tsoha bafung, ho khutlela ha habo bona le ho qala bophelo bo bocha teng.

Empa mantsoe ana a Morena Molimo a behiloeng molomong oa moprofeza Ezekiele, ea phetseng lilemong tse ka bang makholo a tšeletseng pele ho Kriste, a re hlalose tsa seo Morena Molimo a se etsang hlatsuong ea rona: o re tsosa bafung ha re ne re shoele ke sebe, o kenya moea oa hae ho rona, 'me o re beha tseleng e lebang lefatšeng la habo rona, e leng leholimong.

Thutong ea bobeli, lengolong la hae ho bakriste ba Roma, moapostola Paulosi o re boella hore, haeba re e-na le moea oa Kriste ho rona, re tla phela. Esita le 'mele oa rona o shoang ka baka la sebe, o tla tsosoa ke ea tsositseng Kriste bafung.

Evangelii ea kajeno eona e re bolella mohlolo oa qetello oa Jesu oa pele ho lefu la hae. Mohlolo oa hae oa pele e ne e be ha a fetola fetola metsi veine lenyalong la Kana, athe oa qetello, ke ha a tsosa Lazaro bafung, matsatsi a mane a hlokaetse.

Ka ho etsa mohlolo ona, Jesu o n'a rata ho re bontša hore ke eena Messia, Mor'a Molimo. Ea tšileng lefatšeng ho fana ka bophelo bo bocha ho batho bohle, e leng bophelo bo sa feleng ba Molimo. Hape, ke ho tseba hore nako ea hae ea ho pholosa batho e se e fihlile, o n'a rata ho fa lira tsa hae monyetla oa ho phethahatsa morero oa tsona oa ho 'molaea. Mohlolo ona o entsoe Bethania, haufi le Jerusalem, 'me taba ena ea tsejoe hang-hang ke Bafarisi le baholo ba sechaba, ba ileng ba etsa qeto ea ho bolaea Jesu.

Ha re utloa taba tsena tsa Lazaro, potso ea pele eo re ipotsang eona ke ena; ke ka baka la'ng ha Jesu a lumeletse hore motsalle oa hae oa hlooho ea khomo a hloka-hale, le hore likhatseli tsa hae li be litlallong ka matsatsi a mane. O n'a e-na le matla a ho folisa Lazaro a sa kula, a e-s'o shoe. Ha a ka khahloa ke ho etsa joalo, hobane'ng? Jesu o khethile lelapa lena labo Lazaro hobane e ne e le la metsalle ea hae, metsalle e tšepahalang, ea 'nete.

Ha re le tšietsing 'me re hloka thusa ho batho ba bang, re ea ho kopa thuso ho metsalle ea rona e seng ho batho bao re sa tsebang hantle hore na ba tla lumela ho re phallela. Jesu o n'a rata hore metsalle ea hae e be le kabelo mahlomoleng a hae. Ho nts'o le joalo le ho rona; ha Kriste a re jarisa sefapano sa hae, re tsebe hore o'a re rata; 'me le teng re tsebe hore sefapano sena, leha se le boima haholo ka nako e 'ngoe, se tla re fumantšha moputso o moholo, o fetang hole bohloko boo re bo utloang.

Kaofela ha rona re utloa boima ba sefapano sena se bitsoang lefu. Empa joaloka lapeng la Bethania, re tsoanetse ho tseba hore karohano ena e bohloko ke ea nakoana feela. Re tla kopana hape le bafu ba rona, hobane Kriste o hlote lefu 'me o fumantšise batho bohle bophelo bo bocha bo sa feleng ba batho le boiketlo leholimong. Lilengoa-na tsena tsa mahloko tse re tsosang mona lefatšeng, re tla talima e le tse fokolang ha re tla li hopola kamoso re le leholimong.

Empa thuto eo re e rutoang kajeno, ke hore, leha Kriste a re fumanetse bophelo bo bocha bo sa feleng ba boiketlo leholimong re le bana ba Molimo, e mong le e mong oa rona o tsoanetse ho kenya letsoho mosebetsing ona oa Kriste. Augustinus e Halalelang o re : “Molimo o ile a re bopa a sa kope tumello ea rona, empa a ke ke a re pholosa re sa rate.”

Lazaro eo Jesu a mo ratang 'me a mo tsosang bafung o tsoantšha e mong le e mong oa rona. Esita leha 'mele oa rona o lokela ho shoa ka baka la sebe, ho tloha Hlatsuong ea rona re se re le batho ba bacha, ka baka la Moea o Halalelang oa Molimo oo re o nehiloeng, o lulang ka ho rona, 'me o ke ke oa shoa. Kriste ea tsohileng bafung o lula ka ho rona. Ka baka lena re tsoanetse ho phela re le ba tsohileng bafung.

Ho phela re le batho ba tsohileng bafung, ke ho re'ng? Ho tšoana le ha re ne re re: re phela re le bana ba leseli. Ka ho tšoana le Lazaro ea tsohileng bafung: ho ba le thabo kamehla le ho etsa hore batho bohle ba ithabele le rona. Ke ho ba le tšepo litsietsing tsohle tsa bophelo, ka ho hopola hore Kriste oa tseba 'me o tla re phallela ka nako ea teng. Ke ho leboha Molimo linthong tsohle le ho mo sala morao nyene le bosiu, re ntse re hopola hore ha re e-na le eena ha ho letho le lebe le ka re hlalalang. Ke ho ikemisetsa ho jara sefapano seo Morena a ratang hore re se jare, e le mokhoa oa ho mo leboha bakeng la seo a re etselitseng sona le ho mo bontša lerato la rona ka ho tiisa setsoalle sa rona le eena. Ke ho phetela ba bang tse hlolang tseo Morena a re etselitseng tsona, le ho etsa hore le bona ba 'matle, ba moo fumane 'me ba mo sale morao.

Ke eona thuto eo bakatekumena ba e fuoang kajeno, thuto eo le rona bakriste re e hopotsang: Re phele re le batho ba tsohileng bafung.

Bahalaleli har'a Beke

- 23 Tlhakubele Nicon
- 24 Tlhakubele Caimin
- 25 Tlhakubele Dismas
- 26 Tlhakubele Govan
- 27 Tlhakubele Amator
- 28 Tlhakubele Tutilo

Lady Bugs ha e-s'o lahle tšepo

Tšeliso Thakholi

Sehlopha sa Bolo ea Maoto sa Basali sa Lady Bugs se bapalang mokhahlelong oa Region V Women First League tikolohong ea Mazenod, se ntse se na le monyetla oa ho loanela ho ba kahar'a lihlopha tse robeli tse tsekang ho ba kahar'a Women's Super League, kamor'a ho hloloa ke Team go Ladies ka 3-2 lipapaling tsa Mantšano tsa Setereke sa Maseru tse ntse li tsoelapele lebaleng la Bambatha, Maseru.

Lady Bugs e lahlehetsoe ke papali e le 'ngoe mokhahlelong ona oa bobeli oa lipapali tsa mantšano, e na le monyetla oa ho tla bapala le lihlopha tse kang Rejoice Ladies e ileng ea khakhathoa ke Emmanuel Queens ka 6-0 le Boqate Ladies e ileng ea poqoa ke Khabisi Ladies ka 2-1. Lihlopha tsena ka boraro ba tsona li tla bapalana, 'me e tla hloa le tla fetela ho 'li-Quarter Final'.

Haele sehlopha sa Em-

manuel Queens sona se tla lokela ho bapala le sa Team go Ladies kaha e le tsona tse hlotseng. Athe lipapaling tse ling tsa mantšano Kick-4Life Juniors e ile ea rabella First Touch Ladies ka 6-1. Ha sehlopha sa mehleng se kileng sa bapala papali e ntle lihlopheng tse kholo tsa Women's Super League, sa Rovers Ladies se ile sa tlontlolla sa Rural Stars ka ho se rabella ntle ho qenehelo ka 12-1. Massive Ladies ea hlola Mpesa Super Ladies ka 4-0.

Ka mokhoa o tšoanang

tse hlotseng li tla bapala ho fihlela ho hlaha sehlopha se le seng se tlang ho fetela pele, Massive Ladies eona e tla nkana le Rovers Ladies kaha e le tsona bahlohi. Lihlopha tsena li tla koebana ho fihlela ho sala tse 'ne tse tlang ho ea ho makhaolakhang. Lihlopha tse peli tse tlang ho hlaha maemong a pele le a bobeli ke tsona tse tlang ho kena kahare ho lihlopha tse kholo tsa Lesotho Women Super League ha lipapali li fela ka Motšeanong monongoaha.

Kamor'a ho hloleha ho

hapa papali ea Team go Ladies, Mokoetlisi oa sehlopha sa Lady Bugs, Monghali Tankiso Selialia o supile hore ba ntse ba e-na le tšepo ea hore ba tla phunyetsa ho ea liking e kholo. Selialia o boletse hore esale e le morero oa bona oa ho sebetsa ka thata ho nyolohela lihlopheng tse kholo ha selemo sena sa lipapali se fela, 'me ba malala-a-laotsoe ho sebelisa monyetla ona ho fihlela seo.

Ho latela hore Lady Bugs e ne e qala ho fihla lipapaling tsa mantšano, o re o

khotsofetse haholo ke phe-toho eo a e boneng sehlopheng sa habo, 'me bothata bo boholo boo a shebaneng le bona hajoale e bile taba ea ho hlaba lintlha. A re o se a ntse a lokisa maemo ao boikoetlisong ba bona. A boela a re monyetla ona oa ho kenela lipapali tsa mantšano, o fa libapali monyetla oa ho tloaela le ho tseba boima ba lipapali tsa litlholisano le tsa liki. A leboha tšehetso e matla eo ba ntse ba e fumana ho tsoa ho batsoali ka ho lokolla bana ho ea lipapaling.



People's Cup e'a thakholoa

Tšeliso Thakholi

Mokhatlo o Moholo o Tsamaisang Papali ea Bolo ea Maoto Lesotho (LeFA) ka kopanelo le Econet Lesotho, li thakhotse tlholisano ea selemo le selemo ea papali ea bolo ea maoto ea lihlopha tse 16 tsa Liki e Kholo e tsejoang haholo ka hore ke People's Cup. Tsena li etsahetse Bambatha Sports Arena, Maseru, ka la 18 Tlhakubele monongoaha.

H'a bua ho thakholoeng ha litlholisano tsena President ea LeFA, Monghali Lijane Nthunya o boletse hore e 'ngoe ea tseo e leng maano kapa pono ea hae, ke ho batla litšehetso bakeng sa papali ea bolo ea maoto, hobane kantle ho tsona ha hona moo re ka eang teng. Ka hona o motlotlo haholo ka tšehetso eo ba e fumaneng ho tsoa ho kampani ea mehala ea Econet Lesotho.

A supa hore litlholisano tsena li bohlokoa haholo hobane ke ka tsona lihlopha li fumanang botšehetsi

bo matla ho tsoa ho balateli ba tsona. "Ke monyetla o moholo ona oa hore motho a ke a tsoe kahar'a ntle ea hae, a re ke ilo tšehetsa sehlopha sa ka." O boletse joalo a bile a eketsa ka hore motšehetsi ka mong o tšehetsa sehlopha sa hae ka hore ebe oa se khetha ho sa khathellehe hore se boemong bofe lokong.

batsamaisi ba Premier League lea tseba hore ho thata hakae ho tsamaisa sehlopha sa Liki e Kholo, 'me ke taba ea bohlokoa haholo hoba le monyetla oa mofuta ona, kenyang letsoho ho thusa lihlopha tsa rona. Taba ena ke teboho ea ka e khoho lona, 'me ke na le tšepo ea hore le tla eketsa ho feta mona kamoso." Ke eena eo.

lo tsohle tsa sona, morero o moholo oa litlholisano tsena ke ho thusa lihlopha tse kholo tsa bolo ea maoto ho bokella chelete ho tsoa ho batšehetsi ba tsona.

"Rea tseba hore batšehetsi ba kaba teng ba bangata, empa ho ntšha chelete pokothong ho tšehetsa lihlopha ho ba tla ho se bobebe, empa ka tlholisano e mong le e mong o batla hore sehlopha sa hae se eo bapala, e le hore se tle se baloe e le se kaholimo-limo." A re litlholisanong tsa monongoaha phetoho ke hore li se li keneloa ke lihlopha tsohle tsa Liki e Kholo, tseo har'a tsona ho tla tsoa tse 'ne tse tlang hoba le lipalo tse ngata, e le tsona tse tlang ho tseka mohope. A re sena ba se entse e le ho fa batšehetsi monyetla oa ho khetha lihlopha tsa bona tseo ba li ratang, e le ho etsa bonnete ba hore li tla hlaha ho tse 'ne tse kaholimo.

A re ka lebaka la maemo a sa jeseng litheohelang a khoebo Econet Lesotho e tšehelitse sehlopha sa pele seo e tlang hoba moholi ka chelete e kaalo ka M400,000.00, sa bobeli ebe M200,000.00 ha borarong le boneng li tla khaketsoa M100,000.00 sehlopha ka seng. A ipiletsa ho batšehet-

si ho kenya letsoho le toma e le hore lihlopha tsa bona li tle li tsebe ho fumana chelete eo e bang lia e hloka.

Molula-Setulo oa Komiti e Tsamaisang Liki e Kholo, Monghali Hlompho Maitin o lebohile ka ho khetholoha batšehetsi ba litlholisano tsena, kaha li matlafatsa le ho holisa papali ea bolo ea maoto kahar'a naha. A re sena se boetse se arabela thahasello ea bona ea ho bona hore lipapali li anela lihlopha kaofela, e le hore se tla sebetsa ka thata, se tle se tsebe ho iphumanela moputso oa pele. A ipiletsa ho batšehetsi ho ea khetha lihlopha tsa bona ka bongata, e le hore li tle le be le mokhoa oa ho fumana boipheliso.

Ho feta mona ho tla boela ho eba le limpho tse tla fuoa libapali tse tlang ho ipabola litlholisanong tsena, 'me sebakali se hloahlooa se tla fumana M5,000.00, mohlaba-lintlha a fumane M4,000.00, sethibathibane se hloahlooa se fumane M2,000.00, 'man of the match' a ikhapele M4,500.00 ha 'match official' a tla ikhabela M1,000.00. Likhetho li se li ntse li tsoelapele 'me litlholisano tsena tsa letsatsi le le leng li tla tsoareloa Bocheletsana, Mantšonyane ka Moqebelo oa la 25 'Mesa monongoaha.



A boela a supa hore litlholisano tsena li bohlokoa hobane ha batšehetsi ba khethile lihlopha tsa bona, li tla kiba-kiba ka bokhotho-khotho ba chelete e tla tseba ho li phelisa. "Lona

H'a bua lebitsong la kampani e tšehelitseng litlholisano tsena, Mofumahali Puleng 'Mathabo Masoabi o itse ka lebaka la hobane sechaba sa Basotho se rata bolo ea maoto ka lipe-

E suthumeletsa Villa ntšing tsa selemo

Tšeliso Thakholi

Sehlopha sa Bolo ea Maoto sa Basa-
li Villa Ladies se sa tsoa kena Lik-
ing e Kholo ea Womens Su-
per League, se tobane le ho
otloa ke selepe ha selemo
sa lipapali tsa Liki e Kholo
se fela kamor'a ho shapua
2-0 ke sa Berea Ladies Leb-
aleng la Liraoheleng, Ha
Abia, ka la 15 Tlhakubele
monongoaha.

Mathata a na a Villa La-
dies a qalile ngoahola ha
liki e qala, moo ho hlileng
ha bonahala e sa le qa-
long hore e ke ke ea tseba
ho mamella lebatama lena
le chesang la Liki e Kholo,
kaha boholo ba libapali tsa
eona ke tse qalang ho ba-
pala boemong ba liking e
kholo. Ha selemo se secha
se qala ho bonahetse ho
ntse ho sena phetoho ea
letho, kaha leotong la eona
la bobeli ka la 24 Pherek-
hong e ile ea shapua 9-1
ke LDF Ladies.

Ho feta mona ea shapua
lipapali tse tharo tse latel-
lanang ho kenyeletsoa le e
qatang ho fela ea mafelo a
beke e bileng Liraoheleng.
Taba e 'ngoe e ammeng se-



hlopha ke ho lokolloa ha li-
bapali tse ling, ho ea bapal-
la lihlopha tseo e bapalang
le tsona liking eba joale li
se libapala khahlanong le
eona. Ho fihlela hajoale, Vil-
la Ladies lipapaling tse 12
tseo e seng e libapetse ha
e-s'o hlole leha e le papali
e le 'ngoe, empa e bapetse
ka ho lekana lipapali tse peli
feela, ea lahlehela ke lipa-
pali tse 11 kaofela. E bokel-
letse lintlha-kholo tse peli ka
mokotleng.

Puisanong le mokoetlisi
oa Villa Ladies, Rethabile

Tekane "Katara" ka moo
a reneketsoang ka teng
mabaleng a lipapali, eo pelo
e neng e rotha mali ke ho
utloa bohloko o itse o ntse
a e-na le tšepo e tiileng ea
hore sehlopha sa habo se
tla baleha selepe, kaha se
bapala papali e ntle haholo
le hoja boholo ba libapali tsa
hae li e-s'o be le boiphihlelo
bo boholo bakeng sa ho ba-
pala liking e kholo.

"Le ha re bapala hantle
re sa ntse re le sehlopha se
ntseng se e-s'o be le boiphi-
hlelo, 'me ke ne ke entse

tsohle ho itokisetsa papali
ea rona le Berea Ladies,
empa libapali tsa ka ho bo-
nahala li itebala moleng o
kamorao hoba kamehla li-
hlopha li atisa ho re hlola
metsetsong ea ho qetela ea
papali, joaloka eona Berea
Ladies, e re hlabileng lintl-
ha tse peli ho setse nako e
fokolang haholo pele papali
e fihla pheletsong." A rialo.

A tiisa hore khatello e
bonahala e ntse e ba teng
libapaling tsa habo haholo
hobane ba e-s'o hlole leha
e le papali e le 'ngoe, 'me

ba ntse ba le maemong a ho
qetela lokong. A re leha ba
ntse ba sa sebetse hantle o
tlii'o etsa sohle se matleng a
hae ho bona hore lipapaling
tsena tsa bona tse setseng
sehlopha sa habo se seb-
etsa hantle e le ho qoba ho
rathoa ke selepe.

Haele mokoetlisi oa se-
hlopha sa Berea Ladies,
Lehloenyha Nkhasi, o itse
le ha ho bonahala monyet-
la oa ho hapa liki o le teng
hakaalo, thahasello e kholo
ea hae ke ho bona sehlopha
sa habo se le kahare ho li-
hlopha tse 'ne tse ka holimo
lokong ha lipapali li fela. A
re o motlotlo haholo ka tse-
la eo libapali tsa habo li ba-
petseng ka teng, kaha tlhola
ea bona e entse hore ba be
boemong ba bobeli lokong.
"Re ka be re ntse re sebe-
litse hantle ho feta mona,
empa maemo a lebala leo
re neng re bapalla ho lona
a ne a sa re lumelle hore re
ka tseba ho beha bolo ea
rona fatše ra e neheletsana
ka makhetho." Ke eena eo.

Haele lipapali tse ling tso-
na li bapetse tjena: LMPS
Ladies 1-3 LDF Ladies, FC
Stoko 0-0 Bokamoso La-
dies, Kick4Life Women 1-1
Lijabatho Ladies le Mawes
Ladies 0-3 Mphaki HS La-
dies.

O e pholosa tleneng tsa tau



papaling ea mokhahlelo oa
bobeli oa liki e neng e ba-
palloa lebaleng la Setsi sa
Tlhabollo ea Batšoarua,
Maseru, ka la 14 Tlhakubele
monongoaha.

Sehlopha sa Bantu 'A
Matšo Matebele' ka moo se
reneketsoang ka teng, se
bapetse ka seahlolo sa 1-1
papaling eo e neng e le ea
bohlokoa haholo ho sona,
kaha ha se ne se ka e hapa
se ne se tsorama ka holimo
lokong, 'me eba qhoebeshano
e teng lipakeng tsa
Lijabatho le Lifofane ea ho

tseka maemo a pele lokong
e boholoa ke lintja.

Lintša eo e saleng a leka
ka matla ho hlabela sehlo-
pha sa habo ntlha ho tloha
qalong ea papali, 'me a sa
jese mola o kamorao oa
Bantu litheohelang, o ile a
hlaba ntlha e ntle haholo
ka leoto le rutehileng la hae
metsotsong e 86 ea karolo
ea bobeli ea papali. Mola o
kamorao oa Bantu o qetile
boholo ba nako o lula o mo
makile, empa o ile a mon-
yoha matsohong a bona
ba ntse ba mo bokanetse

a hakisa bolo letloha hoja
Bantu e ne e se e lumela
hore e thobile ka khaka.

Lihlopha ka bobeli li bape-
tse hantle haholo papaling
ena kaha li ne li hlaselana
ka matla a maholo, le hoja
Bantu e ile ea bontša e
imetsoe metsotsong ea ho
qetela ea papali hoo e neng
e se e etsa liphoso tse sa
hlokahaleng. Empa tlotla e
lebisoe ho 'mapala-morao
oa eona e leng Johannes
'Mathoho' Molapo, ka
mosebetsi o tsoileng mat-
soho oo a o etseng oa ho
thiba bahlankana ba mola o
kapele ba neng ba phokoa
joaloka litšintši.

LUFC e ne e tšoere ka
matla a maholo papaling
ena, ho fihlela eba e fihla
pheletsong, Bantu e se e
sitoe ho hema ke litlhaselo
tseo e neng e li etsoatsoa
ke mola o kapele oa LUFC.
Ntlha ena e hlabiloeng ke
sehlopha sa LUFC e mat-
lafalitse maemo a sona a
bo-11 ka ho se ekeletsa
ntlha-kholo e le 'ngoe ka
mokotleng eba se ba le tse
22. Ka hona sena se boetse
se fa LUFC monyetlanyana
oa ho leka ho baleha mae-
mong a mabe ao se ka ip-
humanang se rathiloe ke
selepe.

Kamor'a papali mokoet-
lisi oa LUFC Monghali
Makhetha o itse o leboha
haholo boitelo ba libapali

tsa hae, ka ho tsepamisa
maikutlo meralong eo ba
neng ba itokiselitse papa-
li ena ka eona. A re ba ne
ba tliile ka moralo oa ho tla
hapa papali eo, ba na le
moralo oa ho tla papaling
ka 'ngoe ba sa ipherekanye
ka tse fetileng. "Ke thabetse
haholo ho bona phetoho
sehlopheng sa ka papising
le mokhahlelong oa pele.
Ha joale ba bapala hantle
haholo 'me lihlopha tseo re
tlii'o kopana le tsona li tlii'o
kopana le pela lifalla." O bo-
letse joalo.

Makhetha a re ntho e ileng
ea ba tšoenya papaling eo
ke ba thuso ea pele ba se-
hlopha sa Bantu ba neng ba
bonahala ba senya nako e
ngata haholo ha ba thusa
libapali tse hlahlileng likotsi,
nakong eo Bantu e neng e
ntse e lihula pele. "Pelae-
lo ea ka e ne e le hore ke
amang a maqiti ao Bantu e
neng e'a sebelisa ho kha-
na nako. Haeba ke ona ha
se mokhoa o nepahetseng
ho hang." Ke eena eo.

Ho sa le joalo, liki ea li-
hlopha tse kholo e emisi-
tse libeke tse peli e le ho
fa Sehlopha sa Naha Li-
kuena ho itokisetsa lipapali
tse sona tsa AFCON 2027
khahlanong le Seychelles
ho kenyelelitsoe le phomolo
ea beke ea lipapali tsa FIFA.
Liki e tla tsoelapele ka la 4
'Mesa monongoaha.

Tšeliso Thakholi

Khalala ea sehlo-
pha sa LUFC
Lemohang Lintša
o ile a thabisa
barati le batšehetsi ba sehlo-
pha sa habo ba neng ba se
ba nyahame lipelo h'a hla-
ba ntlha metsotsong ea ho
qetela ea papali ho lekanya
lintlha le sehlopha sa Bantu,